

# Бурилиб кетсангиз кетаверинг, ўзингизга қийин!



17:05 / 11.09.2019 3236

Қуръони Каримда шундай марҳамат қилинган:

ثَلَاثٌ ظُلْمَتٍ فِي خَلْقٍ بَعْدِ مِنْ خَلْقًا أَمَّهَتِكُمْ بُطُونٌ فِي يَخْلُقُكُمْ

«У сизни оналарингиз қорнида уч зулмат ичидә бир яратишдан кейин яна бошқа яратишга ўтказиб, аста яратади» (Зумар сураси, 6-оят).

Мана шу оят ҳам Қуръони Каримдаги илмий мүжизалардан яна биридир. Ҳозир кашф қилинишича, она қорнидаги болани уч қават юмшоқ парда ўраб турар экан.

Шуниси қизиқки, унинг уч қават эканлигини оддий кўз билан кўриб бўлмас, балки маҳсус асбоблар билан қаралсагина, аниқ билинар экан.

Эй одамлар, ўзингиз ҳақингизда ўйлаб кўринг. Қачон ва қаердан пайдо бўлдингиз? Сизни ким яратди? Қандай қилиб? Ҳозир эркак билан аёлнинг қўшилишидан дунёга келиб, насли давом этиб келаётган одамзоднинг

бошланиш нүктаси қачон ва қаерда, қандай бўлган? Билмасангиз, билиб қўйинг!

«У Зот сизларни бир жондан яратди».

Аввал бир жонни – Одам алайхиссаломнинг жонини яратди.

«Сўнгра ундан жуфтини қилди...»

Одамдан унинг жуфти – Ҳавони пайдо қилди. Бу ҳам, албатта, Аллоҳ таолонинг ваҳдониятига ёрқин далиллар.

«...ва сизларга чорва ҳайвонларидан саккиз жуфтни туширди».

Чорва ҳайвонларидан тўрт жуфти – туя, мол, қўй ва эчкидан бир жуфт-бир жуфт экани бошқа оятларда айтилган.

Бу чорва ҳайвонлари ўзидан-ўзи пайдо бўлиб қолгани йўқ. Ҳозиргacha бошқа ҳеч ким, уларни мен яратдим, деб даъво ҳам қилгани йўқ. Қила олмайди ҳам. Уларни ягона Аллоҳ таолонинг Ўзигина яратган ва бу ҳақда Ўзи хабар қилмоқда. Бу иш ҳам Аллоҳ таолонинг ваҳдониятига ёрқин далиллар.

«У сизни оналарингиз қорнида уч зулмат ичидаги яратишдан кейин яна бошқа яратишга ўтказиб, аста яратадир».

Инсон ўзини ўзи яратадиги олмайди. Яратиш у ёқда турсин, боласи ҳомила шаклида қачон пайдо бўла бошлаганини ҳам билмайди. Ҳомила аломатлари пайдо бўлганидагина, уни аниқлашга тушади.

Инсонни она қорнида яратадиган Зот Аллоҳдир. Ҳозиргacha бирор кимса, инсонни она қорнида мен яратаман, деб даъво қилгани йўқ, қила олмайди ҳам. Фақат яккаю ягона Аллоҳ таологина яратади. Бу иш ҳам У Зотнинг ваҳдониятига ёрқин далиллар.

Ушбу оятда Аллоҳ таоло инсонни она қорнида уч зулмат ичидаги яратганининг хабарини бермоқда. Уч зулмат нима? Тафсирчи уламоларимиз бу саволга «Уч зулматнинг бири ҳомилани ўраб турувчи парда, иккинчиси бачадон, учинчиси қорин», деб жавоб берганлар. Илмий тараққиёт бу жавобни яна ҳам аниқлаштирилди. Мутахассис олимлар ўтказган текширишлардан ҳомилани ўраб турувчи парда уч қават экани маълум бўлди. Аллоҳ таолонинг

«...оналарингиз қорнида уч зулмат ичида...» дегани бежиз эмас экан. Қориннинг ичида уч зулмат – уч қават пардани яратган ким? Нима учун бир эмас, икки эмас ёки тўрт эмас, айнан уч қават? Шунинг ўзи Аллоҳ таолонинг ваҳдониятига далил эмасми?

Инсонни она қорнида

**«...бир яратишдан кейин яна бошқа яратишга ўтказиб, аста яратадир»** деганда эса босқичма-босқич, аста-секин мукаммал инсон ҳолига келтириш тушунилади. Аввал бошда нутфа бўлди. Ўша нутфани ҳам Аллоҳ яратди. Бошқа ҳеч ким эмас. Бошқа яратувчи бўлса, мен яратаман, деб айтсин. Бир томчи сувдан иборат нутфага инсонлик хусусиятларини жойлаган ҳам Аллоҳ таолодир. Бошқа ҳеч ким жойлаган эмас. Кейин ўша сув тухумга таъсир қилиб, урчиб, зулук шаклига кириб, бачадонга ёпишади. Бунга араб тилида «алақа» дейилади. Ўша алақани ҳам Аллоҳ таоло пайдо қиласи. Унга ҳам инсонлик хусусиятларини Аллоҳ таоло жойлайди. Унинг бачадонга ёпишиши ҳам Аллоҳнинг иродаси билан бўлади. Сўнгра ўша зулуксифат алақа тишланган гўштга ўхшаш нарсага айланади, ундан инсон шакллана бошлайди, суюк пайдо бўлади ва ҳоказо. Буларнинг ҳаммаси Аллоҳнинг иродаси билан бўлади. Ҳеч ким ва ҳеч нима бу жараёнга аралаша олмайди. Ҳатто ҳомиладор аёл ҳам қўлидан бирор иш келмай, эсон-омон туғиб олишини тилаб юраверади. Бу ишлар Аллоҳ таолонинг ваҳдониятига ёрқин далиллар.

«Ана ўша Аллоҳ Роббингиздир».

Мана шу ишларни қилган Холик ва Моҳиру Мудаббир Аллоҳ сизнинг Роббингиздир. Тарбиячингиз, яратувчинингиз, ризқ берувчингиздир, бутун тадбирларингизни қилиб турадиган Зотdir.

«Барча мулк Уницидир».

Аллоҳ борлиқдаги барча мулкка эгалик қиласи. У Зот хоҳлаганича тасарруф этади. Хоҳлаганини яратади. У Зот хоҳлаганини йўқотади. Бу ишлар эса, ўз навбатида, Аллоҳнинг ваҳдониятига далолат қиласи.

«Ундан ўзга илоҳ йўқ».

Ундан бошқа ҳеч бир яратувчи бўлмагач, Ундан бошқа ибодатга сазовор ҳеч бир зот ҳам йўқ. Шунинг учун, эй одамлар, фақат Аллоҳ таолонинг Ўзигагина ибодат қилишингиз лозим.

«Бас, қаён бурилиб кетмоқдасиз?!»

Аллоҳга ибодат қилмай, қаён кетмоқдасиз?! Кўра-била туриб, Аллоҳнинг йўлидан қаён бурилиб кетмоқдасиз?! Бурилиб кетсангиз, кетаверинг. Ўзингизга қийин!

**«Қуръон ва суннатдаги илмий мўъжизалар» ва «Тафсири Ҳилол»китоби асосида тайёрланди.**